

四庫全書

經部

欽定四庫全書

經部

尚書詳解卷二

詳校官給事中<sub>臣</sub>李臺

通政使司副使<sub>臣</sub>莫瞻菴覆勘

總校官進士<sub>臣</sub>程嘉謨

校對官學錄<sub>臣</sub>常循

謄錄監生<sub>臣</sub>訐浚

欽定四庫全書

尚書詳解卷二

宋 夏僎 撰

舜典

虞舜側微堯聞之聰明將授嗣位歷試諸難作舜典

孔子序書次堯典序言昔在帝堯聰明又思光宅天

下將遜於位讓於虞舜作堯典于舜典序言虞舜側

微堯聞之聰明將使嗣位歷試諸難作舜典考其文

意常若終始相因者蓋堯典終於四岳薦舜堯妻二  
女之事與舜歷試諸艱以受堯之禪文義相接故如  
此側微正義謂不在朝廷謂之側其人貧賤謂之微  
孟子曰舜居深山之中與木石居與鹿豕遊其所以  
異於深山之野人者幾希以是觀之則舜在側微之  
中一匹夫耳而史記按世本帝王世系謂堯舜出黃  
帝則舜蓋帝之族姓也既為帝王之族姓不應謂之  
側微今書序言虞舜側微則知世本為附會之說而

孟子之言為可據矣舜典之書載徵五典納百揆賓  
四門納大麓皆充歷試諸艱之事孔子作序將以包  
括一篇大意故言舜在側微而聰明之德堯每聞之  
雖聞之未知其實行故先既試以二女至此則又歷  
歷以諸艱試之蓋所以明舜典之所由作也然諸艱  
之下至于篇終比陟帝位治天下之事然序不及者  
舉其大畧也夫堯之于舜試以二女見其能釐降二  
女子偽汭已知其正家矣能正家者必可以正天下

故至此歷試諸艱則又試以天下事也陳少南有言  
曰堯之得舜由于師錫而序篇乃以堯聞斷之則堯  
之得舜故不在師錫之後也人君苟無先見之明而  
惟左右近習之人是聽其輔於治也亦末矣司馬文  
公有言曰舜自修于畎畝之中而聞於堯此舜之難  
也舜在畎畝之中而堯聞之此堯之難也二說尤可  
取故特存之

舜典曰若稽古帝舜曰重華協於帝濬哲文明溫恭允

塞玄德升聞乃命以位

此蓋作史者總序舜之德也典謨之體皆如此如堯  
典之首言若稽古帝堯曰放勳欽明文思大禹謨之  
首言若稽古大禹曰文命敷于四海祇承于帝皋陶  
謨之首言若稽古皋陶曰允迪厥德謨明弼諧蓋為  
此人作此書必先叙此人有此德體制自應如此也  
蓋作書者之意謂我順理而考于上古得帝舜之行  
事而載于書書曰堯有此文德之光華舜能重之協

合于帝堯而無異不惟能重華而已而且有濬哲文明溫恭允塞之德濬深宏也哲睿知也文文章也明聰明也溫粹和也恭恭敬也允信當也塞充實也凡此八者即玄德也玄幽遠之稱言舜有德而潛修于幽遠之處然舜之德雖韜藏于幽隱之中而實升聞於天朝故堯命以位使之攝行天子之事即下文所謂徽五典之屬也夫作史者先言重華協于帝濬哲文明溫恭允塞而後言玄德升聞乃命以位則舜于



未登庸之前其光輝之德固已能重堯之華矣德既不約而契宜其雖處側微而堯獨聞而知之也由是觀之則堯之知舜非聞于言語物色之間也堯有是德而舜重之以心相知則若契券焉蓋有非耳之所能聞目之所能見者程氏曰濬哲文明溫恭允塞八者以形容其聖德如稱堯曰欽明文思安安稱文王曰徽柔懿恭稱仲尼曰溫良恭儉讓皆聖人之德美此論甚當王氏云堯言欽明文思為成德之序舜言

濬哲文明為修為之序此鑿說也林少穎皆以為堯舜之德此說殊可喜

慎徽五典五典克從納于百揆百揆時叙賓于四門四門穆穆納于大麓烈風雷雨弗迷

伏生以舜典合于堯典故以慎徽五典接堯典帝曰欽哉之文而為一篇至孔氏纂壁中書始釐為二加乃命以位以上二十八字由是始為二篇正義謂東晉之初豫章內史梅賾上孔氏傳猶闕舜典自乃命

以位以上二十八字世所不傳多用王范之注補之而皆以慎徽五典以下為舜典之初至齊蕭鸞建武四年吳興姚方興於大航頭得孔氏傳古文舜典亦類大康之書乃表上之事未施行方興以罪致戮至隋開皇初求遺典始得之是舜典之書前此實以慎徽五典為首也慎徽五典司徒之職也納于百揆奮庸熙載之任也賓于四門典領方岳諸侯之事四岳之職也納于大麓所謂薦之于天是也凡此蓋舜立

德聲聞於充充將命之以位使之兼統衆職以驗其  
能否即上所謂歷試諸艱是也程氏謂五典克從無  
違教而後浸至於百揆之任禮待四方諸侯協和而  
後至于大麓之任其意蓋謂先使之歲五典五典從  
而後使之宅百揆百揆序而後使之賓四門四門穆  
而後使之納大麓殊不知上言乃命以位而繼以慎  
歲五典納于百揆等事則是充既命以位則五典等  
事無所不統舜既兼統庶事則以之慎美五典之教

而五典克從無違教以之納於百揆而百揆時叙無  
違事以之賓迎諸侯於四門而四方諸侯來朝者莫  
不和穆以之納于大麓則雖烈風雷雨不至迷錯而  
害物是皆帝舜庶事隨所施設各底成効初無  
浸至之理故唐孔氏曰舜既臣堯無所不統非五典  
克從之後方始納于百揆非百揆時叙之後方始賓  
于四門此說甚當按左傳文十八年載高辛氏有才  
子八人伯奮仲堪叔獻季仲伯虎仲熊叔豹季狸忠

肅恭懿宣慈惠和天下謂之八元舜臣堯舉八元使  
布五教于四方內平外成高陽氏有才子八人蒼舒  
隤敔檮戾大臨允降庭堅仲容叔達齊聖廣淵明允  
篤誠天下謂之八凱舜臣堯舉八凱使主后土以揆  
百事莫不時叙則歲五典宅百揆雖堯以是試舜舜  
實舉元凱以為之安得為試諸艱哉蓋將以天下授  
舜并以是數事付之以觀舜所以處之之術如何非  
欲舜一一躬親其事也舜之于此果能登庸衆賢分

治其事則舜所以處之者盖有道矣宜乎堯以天下授之也納于大麓說者不同孔氏謂納舜使大錄萬幾之政即百揆之職也前既納于百揆則此大麓有當為大錄萬幾說者又謂麓地名即禹貢所謂大陸既作

帝曰格汝舜詢事考言乃言底可績三載汝陟帝位舜讓于德弗嗣

堯既試舜以諸艱舜隨施試各底成功至此時俾之

陟帝位故命之曰格汝舜格來也言來汝舜克呼舜  
來謂之曰來汝舜我常詢汝以天下之事與汝反覆  
辯論以考汝之言其措置當爾其成謀當爾今三年  
矣而汝向來所言皆以底行而可以立功則汝可謂  
能言而又能行矣汝其不可庸命以登天子之位乎  
底績即上徽五典宅百揆賓四門納大麓皆舜底行  
之實迹也堯即命舜陟帝位而舜乃辭不敢當故曰  
讓于德弗嗣王氏謂讓于德者遜于有德之人也弗



嗣者弗肯陟帝位以嗣堯也沈氏謂舜以其德不能繼堯故辭讓不敢當二說皆通故兩存之正義曰君之馭臣必三年考績考既有功故使升帝位將禪之也夫縣三考乃退此一考使升者何也縣待三考冀其成功無成乃黜之緩刑之義舜既有成他無所待故一考即升且大聖之事不可以常法論也

正月上日受終于文祖

正義謂舜既讓而堯不許乃以堯禪之明年正月上

曰受堯終帝位之事于堯文祖之廟蓋堯為天子于此事終而授與舜舜受之而不更始也王氏徒見此文不加舜字遂謂堯受終于文祖故李校書辨之謂信如王氏之說則下文言在璫璣玉衡之屬亦豈屬堯乎正月李校書謂歲之首為之正月猶正貳之正蓋亦訓長王氏謂政事當歲易者妄也下文格文祖言月正者亦正月也特變文耳王氏謂舜避堯之子方其未踐位天下無政故此格文祖即月而後有政

故言月正亦鑿也上日謂朔日孔氏謂上旬之日魯氏謂上辛上丁上戌之日類三說不同林少穎謂下文言月正元日正月朔旦此則云上日亦宜是朔旦蓋禹受命于神宗既用朔日則舜受終于文祖亦應用朔日不應獨用上旬與上丁之類其曰上日日者特變文耳故唐孔氏謂月之始日謂之朔每月皆有朔日此是正月之朔故云上日言其于一歲是上日也但元日說者泥月令擇元日命民社之言謂元日

乃所擇吉日非朔日殊不知月朔謂之吉擇而用之亦謂之吉論語有言月必朝服而朝則月朔亦有言吉者矣吾安知書所謂元日非月旦乎文祖堯之太祖也蘇氏謂堯之所從受天下者文祖舜所從受天下者文宗授天下于人必告于我所從受之人則文祖實堯之祖也特不知所祖果何人耳按祭法曰有虞氏禘黃帝而郊嚳祖顓頊而宗堯則神宗即堯也神宗為堯則文祖可指為顓頊矣但去古既遠不可以

為必然之論故唐孔氏謂堯之文祖不可強實亦多  
聞闕疑意李校書謂孔氏以文祖為堯文德之祖以  
藝祖為即下文文祖文祖又即藝祖也故知藝祖即文  
祖此說甚當但神宗亦以為文祖則有可論者蓋舜  
受堯之天下於受終與告即政之事皆宜就堯之祖  
廟至禹則受天下于舜矣則舜命當于舜之祖廟豈  
宜亦就堯之祖廟哉故知神宗即有虞氏神宗之廟  
所謂祖顓頊而宗堯者是也

在璿璣玉衡以齊七政

璿璣以璿為璣玉衡以玉為衡唐孔氏謂是天文之器漢世謂之渾天儀者是也璣徑八尺圓周二丈五尺強以一人可以運轉故曰璣衡橫簫長一尺孔徑一寸將考天象先懸璣于上運轉之以象天之運轉然後以衡從下望之以知星宿此璣衡之制也在察也七政日月五星唐孔氏謂日月五星有吉凶之象因其變動為占七者各有異政故謂七政不若沈博

士謂君政得於下天文序于上自然之應故以政言之此說是也然七政在天躔度長短多寡不同然必謂之齊者魯氏謂步七政之軌度時數以轉璣窺衡而不差焉故曰齊其不齊者乃凌歷關食盈縮犯守者也蓋璣衡所見皆時數軌度之當然不知璣衡則為異變此說是也沈存中謂熙寧中受詔典領歷官考察星辰以璣衡求極星從窺管候之凡三月極星常循窺管之中夜夜不差則窺管即玉衡也但璿璣

孔氏云美玉王氏云美珠二說不同後世渾儀既不用珠玉用銅為之則古之璣衡或以玉為之或綴珠其上皆不可得而知孔氏曰舜察天文齊七政以審已當天心與否此說不然夫舜既受堯之終于文祖之廟矣乃始在璿璣玉衡以齊七政以審已之當天與否使七政有愆則將奈何古人授受之義必不然也使其不審天心不符人望則不受之既已受之而方且察天心之當否豈理也哉然則舜受終必在璿



璣玉衡以齊七政者蓋既攝帝位將巡狩方岳以考制度協時月正日同律度量衡也

肆類于上帝禋于六宗望于山川徧于羣神

肆遂也程氏云猶後世作文者言于是也蓋舜攝位既齊天文于是乃類上帝禋六宗望山川徧羣神而告以攝位之事類禋望徧唐孔氏謂皆祭名也所謂類孔氏謂類以攝位事告故謂之類蘇氏亦謂以事告非常禮肆師類造上帝注曰

六宗之祭不見于經諸儒皆意度之誠可疑晉張髦  
為三昭三穆學者多從之然以書考之受終之初既  
有事于文祖其勢必及餘廟豈有獨祭文祖于齊七  
政之前而祭餘廟于類上帝之後乎以此推之則齊  
七政之後所祭者天神非人鬼也孔安國曰六宗四  
時也寒暑也日也月也星辰也水旱也其說自西漢  
有之意其必有傳受非臆度也其神名壇位皆不可  
以理推猶秦八神漢太乙之類豈區區曲學以私意

所能損益哉春秋不郊猶三望分野之星與中國山川乃知古者郊祀天地必及于天地之間所謂尊神者魯諸侯也故三望而已則此裡于六宗望于山川徧于羣神蓋與類于上帝為一禮耳又以祭法考之則曰燔柴於太壇况祭法謂星為幽宗水旱為雩宗合于所謂六宗者但鄭玄曲為異說而改宗為禋未可信也至望山川徧羣神林少穎則依孔氏傳而為之說曰山川為九州名山大川五岳四瀆之屬至此

時而望祭之羣神為邱陵墳衍古之聖賢有功者亦皆祭之此亦本于祭法而為之說也

輯五瑞既月乃日覲四岳羣牧班瑞于羣后

輯之為言斂也五瑞五等諸侯之瑞玉也舜既斂諸侯之五瑞而四方諸侯以舜居攝來朝賀遠近不同來有先後故既月乃日覲四岳羣牧然既月說者不同孔氏謂盡正月中乃日見四岳羣牧林少穎以既月為二月劉敞則謂正月之明日乃二月朔陳少南

因謂之既盡也盡一月乃以是覲諸侯亦謂二月朔也三說不同此皆未盡余謂三說雖不同然孔氏徒見下文言二月東巡狩遂以既月為正月殊不知覲岳班瑞果在正月中則其文當與輯五瑞相接不應加既月乃二字蓋謂舜五載一巡狩於其當巡之歲故二月往東巡守五月南八月西十有一月朔則自歲二月以下乃作書者載舜巡狩之歲月本不與上連文不可泥此二月即以既月為正月也況上文言

三月受終于文祖在璿璣玉衡以至輯五瑞而後言  
既月乃日覲四岳羣收而班瑞寶二月事也但少類  
謂盡二月之日亦不可蓋覲岳班瑞應用許多曰劉  
敞陳少南謂二月朔亦不可蓋舜攝位四方諸侯遠  
近不同故聞有先後而來賀必不能如他朝會同于  
一日余謂既月當為一句乃日覲四岳羣收為一句  
蓋舜自正月受終繼而察璣衡祭羣神輯五瑞行是  
數事月既盡矣乃于月盡之後日覲見四岳羣收既

見羣牧乃還以其所輯之瑞班而還之使歸于國蓋此瑞本與舜居攝班還於諸侯若舜親授故為舜臣所以與之正始也

歲二月東巡守至于岱宗柴望秩于山川肆覲東后協時月正日同律度量衡修五禮五玉三帛二生一死贊如五器卒乃復

歲二月東巡守二孔皆謂舜既班瑞於羣后即以其歲二月東巡守省守土之諸侯此說不然蓋上文覲

岳班瑞乃二月事前于既月解辦之詳矣觀岳班瑞  
既為二月事此則二月不應為當年二月事少穎以  
此二月加歲字于中乃歲之二月蓋前一年羣后來  
朝故至明年舜乃巡守考制度于四岳此說雖順經  
文而經無明文又安知歲二月為明年之二月哉蓋  
經但云歲二月未嘗言來歲之二月豈可直指此歲  
字為來歲乎余謂舜之居攝先既輯當次之班瑞自  
是之後必有一歲往巡狩四方故此直云歲二月東



巡守必是居攝之後于中有一歲二月巡東五月巡南八月巡西十一月巡北也岱宗唐孔氏謂岱之與泰其山有二名引風俗通云泰山山之尊也一曰岱宗其說以泰宗即泰山也舜既巡狩故先王東岳之下燔柴祭天以告至即燔柴祭告至乃望祭山川而秩者蓋有當祭而不祭者有不當祭而祭者與其品位之高下牲禮之厚薄莫不各有其序故山川不可不盡其秩序也舜既燔柴告天望祭山川即于東岳

之下遂見東方之諸侯而與之考制度自協時月正  
日以下皆考制度之事也孔氏謂協時月正日合時  
之節氣月之大小日之甲乙使齊一也蓋古者天子  
諸侯國皆有掌歷之官天子歷官主頒朔于諸侯若  
堯之命羲和四子是也諸侯則不得自為正乃受歷  
於天子還以天子之歷頒受其民故堯命羲和四子  
定律數既頒朔于諸侯矣至舜居攝恐諸侯國異或  
不齊同故因巡守而協之協之為言合也蓋以王朝

之正朔考而合之然時月言協而日言正者蓋時之  
差常起于日之不正故曰尤不可不正也時月日既  
協而正之則歷法定矣歷法既定然後律度量衡可  
考而知焉蓋度量衡生于律而律之十二又生于歷  
之十二辰班孟堅律歷志云推歷生律制器規圓矩  
方權重衡平準成度量探賾索隱鉤深致遠莫不用  
焉則律度量衡實本于歷矣律度量衡既本於歷則  
舜于巡狩之際欲同律度量衡所以必先協時月正

日數同之如何盖考而校之使遠近內外均同如一也既同律度量衡于是又脩吉凶軍賓嘉之五禮欲禮樂征伐自天子出焉盖禮隨時損益久而不脩必有偏而不起之處故巡狩之際所以脩之五玉三帛二生一死贄者巡防于四岳之下覲諸侯考正制度故五等諸侯與其國之卿大夫士各以其所執之玉帛生死以贄見于天子鄭玄謂贄之言致所執以自致也此說是也但孔氏以五帛連上脩五禮之文唐

孔氏謂不言修者蒙上之修字此說不然夫禮固有  
因革損益謂之修可也五等諸侯執圭璧來朝不過  
正品秩而已何修之有張橫渠以修五禮為一句今  
按周禮典命雖只云諸侯之適子未誓于天子以皮  
帛繼子男公之孤四命以皮帛取小國之君竊意孔  
氏亦有所據但不知出何書二生謂卿執羔大夫執  
鴈是也一死謂士執雉是也鄭玄謂羔取其羣而不  
失其類鴈取其候時而不知其形雉取其守死而不

失其節恐或如此至林少穎則所謂贄之物量其貴賤輕重以寓其等差非有義理于其間王氏曲生義訓穿鑿之甚皆無取焉夫既云五玉三帛二生一死贄又加五器卒乃復者蓋三帛二生一死天子受之惟五玉禮終則復還諸侯程氏謂諸侯尊而至重已覲復還其玉所以禮答列辟此說是也按聘義云聘重禮也已聘而還圭璋輕財重禮也此雖主于聘禮竊意朝禮亦然又按周禮司儀云諸公相見為賓還

圭如將幣之儀是圭璧皆還之也士相見禮大夫以下見國君之禮若他邦之人則使擯者還贄已臣皆不還其贄是三帛二生一死則不還也又按周禮膳夫云凡祭祀致福者受而膳之以贄見者亦如之鄭司農注云以羔鴈雉見者亦受以給王膳則三帛二生一死不還也明矣河南劉敞不深求其故乃謂五器為吉凶禮樂戎器陳少南和之乃謂如同也巡狩之時同吉凶禮樂戎器巡狩既畢乃自方岳反還蓋

謂巡狩既修五禮又修五玉又修三帛又修二生一  
死至此又同五器卒事乃復還此皆徒見前言五瑞  
又云五玉又云五器辭異如此遂生分別不足取也  
程氏謂五器即五瑞五瑞即五玉以其物言則曰玉  
以其寶言則曰瑞以其形言則曰器此說是矣

五月南巡狩至于南岳如岱禮八月西巡守至于西岳  
如初十有一月朔巡守至于北岳如西禮歸格于藝祖  
用特



舜之巡守既以二月有事于岱宗岱宗禮畢因而南  
巡以五月至于南岳衡山其燔柴望秩山川以下皆  
如岱宗之禮南岳禮畢因而西巡以八月至于西岳  
華山其禮亦如初時西岳禮畢因而北巡而以十有  
一月至于北岳恒山其禮同于西岳之禮四方巡行  
其禮如一然必曰如岱禮如初如西禮者特作史者  
變文耳本無別義北岳禮畢然後復于京師格于文  
祖之廟其牲用特牛告于文祖以其歸之既至故曰

格春秋桓十有二年公及戎盟于唐冬公至自唐左  
氏曰告于廟也凡公行告于廟反行飲至舍爵策勳  
焉則舜之格藝祖即此所謂飲至之禮也孔云云藝  
祖即文祖以文之與藝其義相同故知其必爾也朱  
博士曰天子巡守必順陰陽之氣以出入春東而夏  
南秋西而冬北又以地言之則自東徂南自南徂西  
自西徂北然後由此以入京師蓋理當然此說得之  
據此云巡北岳既畢然後歸格于藝祖用特則是一

歲周四岳然後歸也胡舍人疑之以謂計其地里恐不相及鄭玄乃以謂每岳禮畢而歸仲夏乃復更出夫一出而巡四岳胡舍人尚計以地里考其日程謂不能周萬五千里若巡一岳歸至仲月再出則一歲出入往來不啻數萬里此必無是禮也故孔氏有言曰四巡之後乃云歸格則是一出而周四岳若如鄭言當于每巡之下即言歸格後以如初包之何當北巡之後始言歸乎且若歸而復去計程不能周徧此

未必然也是說甚當

五載一巡狩羣后四朝敷奏以言明試以功車服以庸  
前既載舜巡狩四岳之事至此則又總結前言故言  
五載一巡守謂此巡守四岳之禮蓋五載而一行也  
羣后四朝說者不同孔氏謂羣后各朝于方岳之下  
凡四處故曰四朝胡舍人既疑其一載而不能巡守  
四岳遂以五載一巡守一年而東一年而南一年而  
西一年而北此羣后之所以四朝五年之中一歲息

駕二說皆不然蓋上文言肆覲東后而南西北覲禮  
又皆如岱如初如西則巡守之際諸侯朝于方岳之  
下上文已備言之不應于此又言諸侯朝于方岳之  
下凡四處則孔氏之說所以不然者此也天子適諸  
侯曰巡守諸侯朝于天子曰述職是諸侯未嘗不來  
朝于京師今若胡氏謂四年巡四岳諸侯四朝方岳  
則諸侯惟朝天子于方岳之下而已未嘗朝京師必  
無此理則胡氏之說不然矣惟鄭玄謂巡守之年諸

侯各朝于方岳其間四年則四方諸侯來朝于京師  
此說得之蓋唐虞分天下為五服其在畿內甸服之  
君則皆執事之臣朝夕見焉不特朝覲至于侯服當  
一年一朝綏服當二年一朝要服當三年一朝荒服  
當四年一朝四年朝畢則五載天子巡守若周官六  
年五服一朝又六年王乃時巡考制度于方岳即此  
禮也但時有先後故禮有詳略則巡守來朝年歲不  
無久近之不同耳既言羣后四朝下又言敷奏以言明試

以功車服以庸者蓋天子五載一巡守但協時月同  
律度修五禮之類而已未暇黜陟也五載一巡守之  
後其間四年四方諸侯來朝京師則訪問之使陳其  
言既言矣則明試其言以考其功功之既著則庸以  
車服也庸與格則承之庸之庸同蓋言用之也采  
菽之詩曰君子來朝何錫予之雖無予之路車秉馬  
又何予之玄衮及黼此即車服以庸之事也而王氏  
乃以為民功之庸謂上之所用用民功為主此附會

之說也唐孔氏既以四朝為四朝方岳之下遊以敷  
奏以言以下亦巡守之所行其說謂諸侯四處來朝  
每朝之處舜使目說已之治政依其言明試之以要  
其功如其言則賜以車服余謂四朝既不依孔氏之  
所說則此說亦不可從

肇十有二州封十有二山濬川

沈博士謂充遭洪水天下分絕故舜始分為十二州  
禹平水土然後更別九州其說蓋謂肇十二州乃在



禹平水土之前反復考之沈氏於經初無明文可據  
彼徒見商詩言九圍商書言九有王制雜記商周之  
制亦稱九州而十二州之名未聞于夏商之時兼又  
周官職方爾雅亦只載九州遂謂十二州乃洪水前  
權宜分置禹既平水土乃復舊制為九州夏商承之  
故亦為九州殊不知舜居攝二十八載堯殂落之後  
是時水平已久舜尚有咨十二牧之言安得為洪水  
之前舜分十二洪水之後禹復正而為九而不復為

十二哉。兼周官職方載九州有幽并而無徐梁爾雅載九州有幽營并而無梁青幽營并三州本皆舜時分置之州名若使洪水之前有此名洪水之後禹重正之使復于舊如禹所載則幽并營之名至禹平水土之後已無聞矣。豈至商周而猶有存者。余竊謂洪水之初禹別九州而治之既平之後舜乃分為十二。故于九州之外別立幽并營三名。夏商周承之故幽并營之名猶存。然詩書職方爾雅只載九州者。蓋舜

于平水土之後實分為十二至夏商時或有重合而為九或去徐梁而存幽并之名或去梁青而存幽營之號不可得而知惟唐孔氏按左傳宣三年云昔夏之方有德也貢金九牧則禹登王位還置九州此說似乎有理故漢孔氏亦直謂禹治水後舜分冀州為并州幽州分青州為營州置十二州程氏林少穎皆依此說但唐孔氏謂禹貢治水通縣為十三載則舜攝位元年治水功畢二年之後分十二州林少穎此說

甚合禹貢作十有二載乃同之說與孟子八年于外之說但少頽既有此說自信不篤及疑舜居攝次年則巡守朝諸侯考制度使洪水未平則此禮不可得而講觀此則治水功畢又當在居攝之前數說皆齟齬學者當闢之原少頽之意若謂如前之說治水功畢故在居攝數年之後今考之經前既載舜居攝之事次載舜歲二月東巡守之文是巡守近在居攝之二年矣巡守欲周行四方若時洪水猶未平舜如何

巡守今舜既以二年巡守則治水之治當先二年而  
畢由前說則功畢於數年之後由後說則功畢於二  
年之先故少穎以為齟齬不合學者當闕而不論余  
謂少穎前說極當後說乃考之未深論之未熟耳何  
以知之蓋典謨所載堯舜之事雖因其事之先後次  
第載之然實非一時事或近在一日或遠間數十載  
作史者因其先後而次第錄之以成文理正不可聯  
為一時之事若堯典既載命羲和即及若時登庸即

及若予采即及縣治水命舜禪位豈可聯為一時事  
謂充既命義和即行下教事哉今舜典前既載舜居  
攝之事次即載舜二月東巡守之文竊意舜之居攝  
既輯瑞為諸侯正始矣數歲之後洪水既平于其中  
間以歲之二月五月八月十一月巡守四岳又豈可  
聯為一時之事謂舜既居攝即以次年巡守遂以此  
疑治水功畢于舜居攝之前乎學者當精思也封十  
有二山濬川者洪水之後舜既分十二州又封殖十

二州之山與其川而深濬之封山所以禁採伐濬川  
所以除壅蔽恐其後為水害也孔氏乃以封訓大每  
州取山之殊大者以為一州之鎮按左傳云封豕長  
蛇則封可訓大矣但此封若訓大當言大十有二山  
其文不順故不若訓以封殖之封十二山諸儒皆以  
為十有二州各封一山之長者以為鎮亦不若凡十  
二州之山皆封殖之川皆深濬之如禹貢九山刊旅  
謂九州之山皆刊木而旅祭九川滌源謂九州之川

皆疏滌其根源也山言十二而川不言者胡益之云  
川之交會非若山之可以州別故不言十二觀此說  
似有理故特存之

象以典刑流宥五刑鞭作官刑扑作教刑金作贖刑眚  
災肆赦怙終賊刑欽哉欽哉惟刑之恤哉流共工于幽  
州放驩兜于崇山竄三苗于三危殛鯀于羽山四罪而  
天下咸服

此又言舜明慎用刑之道也象以典刑漢孔氏以象



訓法蘇氏亦依其說唐孔氏遂引易繫辭云象者像此者也是象為放法故以象訓法謂各象其所犯程氏亦謂象罪之輕重立為常刑而說文謂象刑為畫象之刑其說蓋出于大傳與漢帝之詔雖若相似然以象為畫象而解象以典刑之句其辭不順又荀子謂世俗之說曰治古無肉刑而有象刑是不然以為功則人民莫觸罪非特不用肉刑亦不用象刑矣或觸罪而直輕其刑是殺人者不死傷人者不刑亂

莫大乎此惟薛氏云世俗謂畫衣冠異服章為象刑  
豈非讀舜典而誤歟歷考數說惟王氏之說為長王  
氏之說曰象者垂以示人之謂若周官垂刑象于象  
魏是也蓋王者之法如江河必使易避而難犯故必  
垂以示人使知所避苟不垂以示人使知所避及陷  
於罪然後從而刑之是罔民也此舜所以象以典刑  
者蓋示民以常刑之法使知所避也周官太宰正月  
之吉始和布治于邦國都鄙乃懸治象之法于象魏

使萬民觀治象挾日而斂之此即所謂象以典刑者也林少穎謂此象以典刑一句乃統說其事自流宥五刑至怙終賊刑乃垂示典則之目也此說雖可喜然象以典刑為統說以流宥五刑以下為衆刑之目則是舜刑時有流鞭扑贖數等無五刑正法按大禹謨舜美臯陶作士有曰五刑有服五服三就五流有宅五宅三居皆先言五刑而後言五流則此不應只說五流以下而不言五刑正法余謂象以典刑是舜

示民以常刑常刑即五刑也既言五刑故下言流宥  
五刑即是五流此說與帝舜之言合故此說以少類  
為長流宥五刑漢孔氏謂流放之法宥五罪唐孔氏  
廣其說謂據其狀合刑而情差可恕全赦則太輕致  
刑則太重不忍依例刑殺故完全其體流之遠方王  
氏諸儒皆同此說其說極當舜既以五流宥五刑之  
輕者至于官事不治其罪至輕又不應致以五刑五  
流之法亦不應宥而赦之者故舜又立鞭撻之法以

為治官之刑周禮條狼民誓大夫曰敢不關鞭三百  
即鞭作官刑是也其有學校之間不勤學道者即扑  
之以為學道之刑記曰夏楚二物收其威也即扑作  
教刑是也然舜又謂人有過悞入罪罪涉疑似鞭之  
刑之宥之赦之皆所不可故又作贖刑是也但孔氏  
謂金為黃金唐孔氏謂安國以此金為黃金以呂刑  
其罰千鍰為黃鐵俱是贖罪金鐵不同者古之金銀  
銅鐵總號為金周官考工金之工七其所為者有銅

有鐵是銅鐵皆為金則此黃金呂刑黃鐵是皆今之銅也古之贖罪者皆用銅後始改用黃金但少其斤兩令與銅相敵此說亦有理舜垂刑象既立五刑五流鞭扑與金贖之法矣故于下文言青災肆赦怙終賊刑以見用上數等刑罰皆原其情而為輕重也漢孔氏謂過而有害乃緩赦之程氏謂青過也過失而入于罪者災害非人所致而至者青則縱肆寬緩之災則赦而除釋之林少穎謂青災者不幸而入于罪

戾其罪非已作或為人望悞而入于刑如論語所謂  
雖在縲紲之中非其罪也如此之人情在所恕逋逃  
未獲則肆之已獲而囚繫則赦之魯氏又謂自生謂  
之青天火謂之災青災雖有所肆亦赦焉怙終賊刑  
漢孔氏謂怙姦自終當刑殺之程氏謂怙恃其惡與  
終固為非者殘害之以刑蘇氏謂恃惡不悛以害人  
則刑之曾氏謂內怙財外怙寵謂之怙成而不肯改  
者謂之終怙終而有賊則刑之數家之說皆有可取

惟林少穎謂孔氏以賊刑為刑之殺豈有聖人用刑  
所以賊人故引左傳叔向曰已惡而掠美為昏貪以  
敗官為墨殺人不忌為賊昏墨賊殺臯陶之刑也少  
穎引此蓋謂左傳所言昏者墨者賊者即殺之其文  
勢與怙終賊刑相似故其說謂怙乃怙恃其惡終乃  
為惡而終不改賊乃賊害人者此三者情重故皆刑  
之夫少穎解此既謂怙終賊刑三者情重當刑則上  
青災肆赦不當謂青災者則肆緩而赦宥之亦當謂



青者災者肆者三者情輕皆赦之蓋自已所悞為謂  
之青因人而致罪謂之災縱緩自怠於事不勤謂之  
肆三者情輕是舜所以赦之也鄙見如此更在學者  
精思去取之欽哉欽哉惟刑之恤哉程氏謂史官既  
載舜制刑之法而重明舜之意曰舜之用刑欽哉欽  
哉惟刑之恤哉言其敬慎哀矜之至也孔氏云舜陳  
典刑之義勅天下使敬憂欲得中以此為舜言非也  
史官既言慎用刑於是又論誅四凶之罪以見其用

刑之當也舜臣充賓于四門流四凶族投諸四裔以  
禦魑魅杜注以渾敦為驩兜窮奇為共工檮杌為鯀  
饕餮為三苗據此而言舜流四凶在歷試之初肇十  
二州封十二山濬川乃在禹平水土之後而作典者  
載前後之辭如此者蓋史官因言舜之明慎用刑遂  
援其誅四凶之事以為証非謂肇十二州而後誅四  
凶也唐孔氏亦云此四凶者徵用之初即流之居攝  
之後追論成功之狀故作書先叙典刑言舜重刑之

事而連引四罪驗其刑當之實此說得之但鄭氏徒見此經先言肇十二州而後言誅四凶以為治水既畢乃流四凶王肅難之曰若待禹治水功成而後以鯀為無功而殛之是為用人之子而流放其父則禹之勤勞適足以致父之殛於舜失五典克從之義禹陷三千莫大之罪進退無據豈不迂哉唐孔氏亦謂流者移其居處若水之流然放者使之自治竄者投棄之名殛者誅責之稱俱是流徙異其述作之文體

耳此說得之但殛鯀羽山說者孔氏因太公有變北狄南蠻西戎東夷之說遂以幽州為北裔崇山為南裔三危為西裔羽山為東裔切意二公所以有此說者徒見左傳有投諸四裔之言遂分東西南北之異要之左傳所謂四裔亦猶言四處而已非有南北東西之異也況四凶之惡貫盈故投之遠惡之地其何以變東夷南蠻西戎北狄哉此必無之理也四凶不誅于堯世而誅于舜時紛紛之說多矣惟周恭叔謂四凶

皆有過人之才在堯之時朝廷清明皋陶稷契之徒  
相與彌縫無所肆其惡則堯雖欲誅之其可得乎況  
靜言庸違方命圯族堯已知其惡非堯不能知也及  
一旦舜舉于側微使四凶北面而臣然後始有不平  
之心其罪已著舜雖欲不誅其可得乎四凶之惡其  
始也見用于堯其終也見罪于舜皆自為之堯舜豈  
容心于其間哉此說盡之既言誅四罪而繼以天下  
咸服蓋言罰有罪而天下心服也

二十有八載帝乃殂落百姓如喪考妣三載四海遏密  
八音

漢孔氏謂堯年十六即位七十載求禪試舜三年自  
正月上日至崩凡壽一百一十七歲唐孔氏按堯禪  
之年即得舜而試之求禪試舜共在一年更得二年  
即為歷試三年更加舜居攝二十八年合後舜三十  
在位之數是堯壽實一百一十六歲孔云一百一十  
七者悞也舜攝二十八載而堯崩不曰崩而曰殂落

漢孔氏謂即死也唐孔氏廣其說謂殂往也言命盡而往落者若草木之落也故王氏諸儒從而為之說曰魂氣歸于天故謂之殂體魄降于地故謂之落此說極當禋之盛德浹洽人心今既殂落百姓思之如失父母三年之間四海之內皆盡絕八音而不復作樂蓋思克而不忍聞也

月正元日舜格于文祖

月正即正月也元日即上日也舜前以正月上日受

終文祖乃是攝位未嘗即政今堯既崩三年喪畢故以正月復至文祖之廟告已踐天子之位也前言正月上日此言月正元日特史家變文耳初無別義王氏乃謂即月而後有政故言正曾氏廣其說舜之中國踐天子位之月格正以更一代之始建元以更一君之始故言月正元日夫舜前雖受終天下乃堯之天下故用堯之正元堯喪畢踐天子位于是月則始用舜之正元也殊不知改正朔易服色以順天命故



王氏曾氏所以藉為曲說非通論也惟唐孔氏謂正  
訓長月正言月之最長即是正月上日日之最上元日  
即是上日且引王肅云月正元日猶言正月上日若  
孔云令月吉日又變言吉月令辰此說如何漢孔氏  
與諸儒皆謂此月正乃舜服喪三年既畢之正月按  
孟子曰堯崩三年之喪畢舜避堯之子于南河之南  
天下諸侯朝覲訟獄者不之堯之子而之舜故曰天也  
夫然後之中國踐天子位孟子既言如此而此又承

三載四海過客八音之下故知此月正即服禭喪畢之正月也

詢于四岳闢四門明四目達四聰

舜既即政之後詢謀于大臣求所以治天下之事也  
曾彥和謂于者往之之詞大有為之君必有所不召  
之臣欲有謀焉則就之詢于四岳者謂往就四岳特  
為謀于四岳而已若十二牧則咨誨之而已無所往  
故不言于余竊謂此所謂詢于四岳特為謀于四岳

而已下所謂闢四門明四目達四聰者乃其所以謀  
四岳之事也不必曲為之說惟唐孔氏解此言達而  
得理謂舜告廟既訖乃謀政治于四岳之官所謀者  
為闢四方之門使為已廣大仕路招置衆賢明四方  
之目使為已遠視四方達四方之聰使為已達聽于  
四方恐遠有所蔽塞故令為已悉聞見之此說甚善  
一說又謂天下之利害生民之休戚君門萬里黼座  
九重不能徧知故舜即政之初首詢四岳使之闢四

門所以來此明四目者所以視此達四聰者所以聽此蓋欲四方之情雖至遠常不越乎廡陛之下耳目之間焉此說亦然夫四方之來各由其門而入則門固以四言若耳目者特人君之兩耳目之聰明耳何言四目四聰哉蓋人君端處一堂覽觀四方四方之情皆欲耳聞而目見故言四目四聰蓋欲耳目之力常徧察四方故也

咨十有二牧曰食哉惟時柔遠能邇惇德允元而難任

人蠻夷率服

周官曰唐虞稽古建官惟百內有百揆四岳外有州牧侯伯舜前詢于四岳則已詢之在內之臣矣此咨十有二牧則又及于在外之臣焉曰咨曰詢皆是訪問之意也夫天生聖人為之司牧則人君為天牧民也人君綿地千里而寄之州牧則牧守為君牧民也牧民之道以食為先言食哉維時欲民之粒食當使之各得其時李校書謂書稱惟時亮天工惟時有苗

弗率皆以時訓是則食哉惟時亦應訓是而先儒乃  
謂當以敬授民時之時者以句自此絕則訓自當異  
與直哉惟清同句體也此說甚善彙遠能邇孔氏謂  
安遠如安近鄭玄謂能猶如也安遠之國順如其近  
者蘇氏謂能讀如不相能之能懷柔遠者使與近者  
相能王氏謂遠者柔之而已近者吾所治也故當能  
之曾彥和廣其說謂富之教之刑賞因革無所不能  
故曰能邇此數說皆費訓釋不若李校書之說為近

而易見李校書曰能者耐也古文能耐皆同字則能  
邇者居上以寬之謂也遠人修文德以來之所謂柔  
遠也至于邇人尤在所能忍以有濟昔人所謂弗擾  
獄市又言不如是何以為京師皆能邇之謂也詳考  
李氏之意蓋以能邇若世俗所謂忍耐得事況人之  
不能相容者皆謂之不相能能則實耐之意惇德允  
元而難任人諸儒皆謂有德者惇厚之元善者信任  
之蓋進德而用之也任人佞人也佞人謂之任人謂

其包藏不可測知若婦人之妊娠焉謂之任難者過  
絕之使不得進皆退不肖而遠之也此說雖善未若  
毛李中謂君子與小人勢不兩立誠能于有德者厚  
之元善者允之是非取舍足以服羣小人之心人居  
雖未嘗求速而斥之彼自不敢進此悖德允元乃是  
難任人之道此說極善自食哉惟時至而難任人是  
數者誠能行之則內治舉矣內治舉則蠻夷所以相  
率而來服也胡益之謂蠻夷以身率之則服此說誤



矣

舜曰咨四岳有能奮庸熙帝之載使宅百揆亮采惠疇  
兪曰伯禹作司空帝曰兪咨禹汝平水土惟時懋哉禹  
拜稽首讓于稷契暨皋陶帝曰兪汝往哉

舜既終禋三年之喪格于文祖然後即政而稱帝此  
稱舜曰者所以別禋也蓋自此而上稱帝曰屬之禋  
自此而下稱帝曰者皆以屬舜也故于此特稱舜曰  
以別之林少穎謂書之所載至為謹嚴蓋懼其涉于

疑似有以啓後世異同之論也舜既即政咨于四岳  
將求其可以宅百揆者故咨以有能奮庸熙帝之載  
使宅百揆其意蓋謂百揆之職其任至重所以亮采  
者在是所以惠疇者在是非已試之効不可居其職  
故舜必欲求能奮起其功廣堯之事者然使之宅之  
以當堯之時能奮功廣事則已有成効可驗故用之  
則無不稱其職薛氏乃謂帝載猶云王事殊不知帝  
載自他人言之則可謂之王事自舜言之則不應自

指其事而謂之帝事則帝戴寔堯事也亮采惠疇亮  
蓋如弼亮之亮寅亮之亮疇蓋如九疇之疇疇之為  
言類也謂居百揆之職也於弼亮朝廷之事皆當各  
順其類而不至于例行逆施也孔氏乃以疇為誰謂  
舜求人居百揆之官谷于四岳謂信能立其功順其  
事者誰歟以亮采惠為一句以疇為一句文勢不順  
王氏以亮采為明其事惠疇為順其疇衆其意以疇  
為百官之疇衆夫以疇為百官之疇衆則不當言惠

惠之為言順也百官當稟命于百揆豈有以百揆之尊而反順于百官之衆于理不通皆不可取唐孔氏按國語云有崇伯縣賈逵云崇國名伯爵也以伯禹必代縣為崇伯入為天子司空以受其伯爵故稱伯禹恐有此理四岳既採衆議薦禹舜于是俞而然其舉且稱美禹曰汝平水土實有成績今居是職可不勉哉故曰惟是懋哉舜既命禹使居是任禹則稽首而拜讓于稷契臯陶益推賢遜能之事也稽首首至

地也唐孔氏謂拜稽首蓋謂拜而稽首也稷官名也  
契臯陶皆稱名而稷稱官者唐孔氏謂出自禹意不  
必注義其說是也禹既讓于稷契臯陶舜則俞而然  
之直曰汝往哉蓋謂所讓之賢非不當才皆已各有  
職任汝不可不往下文言汝后稷播時百穀汝作司  
徒汝作士皆因禹之讓稱美前功以見其各有職任  
禹不可固讓也

帝曰棄黎民阻飢汝后稷播時百穀

舜命九官或讓或不讓學者多疑之沈博士謂舜命九官有知其人而命之者有咨于衆而命之者已知其人則不復咨于衆而受其任者亦不辭咨于衆而得人雖任之無疑而受任者必辭遜而居職所謂濟濟相遜也此說雖有理不若唐孔氏為有擬孔氏謂帝因禹讓三人而官不轉各述前功以勸之故林少穎特從其說且按孟子洪水橫流老獨憂之舉舜而敷治焉舜使益掌火禹疏九河后稷教民稼穡契為

司徒是皆在舜未即位之前分別于九官之次者特  
為禹既讓之三人舜不之許姑稱述其功而由微之  
焉且以見其各有職任無可遷者也由少類此說以  
考之則因讓是効遂云益稷脫文重出于此余謂夔  
龍之命乃因伯夷之讓而重述其功夔亦因贊其所  
職之効正不可指為脫簡也棄稷之名也蓋其生稟  
之隘巷寒冰乎林故以棄為名也禹既讓之故舜稱  
其名而美其功曰洪水未平黎民之艱阻而在于饑

餒者惟汝居稷官教民敷播百穀則汝功誠可嘉也  
蓋禹既讓之舜不從故稱其功以慰后稷之心也穀  
品雖多未應有百言百穀者以穀品荏粟麻麥與大  
秬秠糜芑之類其種非一故取數多以百言之稷為  
五穀之長故主穀之官以稷名之謂之后稷者官實  
名稷特以棄居稷官雖在朝為公卿亦分土祚氏為  
諸侯尊而君之故尊為后稷如呂刑稱其三后發稱  
后夔皆尊而君之也



帝曰契百姓不親五品不遜汝作司徒敬敷五教在寬  
此亦因禹讓稱美前功而申命之也五品謂父子君  
臣夫婦朋友長幼五者各有尊卑品秩故謂之五品  
因其品秩而教之故謂之五教即父子教以親君臣  
以義夫婦以別長幼以序朋友以信者也要之品乃  
自然之秩教乃因其秩而施其教也左傳以父義母  
慈兄友弟恭子孝為五典不若孟子以父子君臣夫  
婦長幼朋友為五典足以盡人倫之道舜之意謂往

者教化不明百姓不相親睦五者尊卑品秩之序皆不遜順吾既已受命汝作司徒以掌是事則汝往乃職可不敬敷五典之教以教之乎然雖教之又須寬以居之不可急迫陳少南謂亟則以德為怨否則相率為偽蘇氏謂敷此五教以敬為主以寬濟之以敬為主者民之直之之謂濟之以寬者使自得之之謂二說雖美惟少穎之說為詳

帝曰舜陶鑒堯猾夏寇賊姦宄汝作士五刑有服五服

三就五流有宅五宅三居惟明克允

此亦因禹讓稱述前功以申警之也按孟子之言舜使益掌火禹疏九河稷播百穀契敷五教雖無用皋陶之文然下繼以堯以不得舜為已憂舜以不得禹皋陶為已憂則皋陶亦與稷契同時登庸也以此推之可以知皋陶前此已為士師久矣王氏見此蠻夷猾夏之言遂謂是周大司馬之官當舜之時以士師兼之其意蓋謂蠻夷猾夏非刑可制必加以兵故謂

臯陶實兼掌兵刑之任諸儒和之以謂唐虞兵刑之  
官合而為一成周分而為二殊不知此言蠻夷猾夏  
寇賊姦宄汝作士之下特云五刑有服五流有宅未  
嘗有兵也兼後誅三苗之兵而禹掌之未嘗用臯陶  
則謂臯陶兼掌兵刑之任其說非也然而此必先言  
蠻夷猾夏寇賊姦宄者胡益之謂天下本無事蠻夏  
內侵人民離散常法一曠則寇賊姦宄因而生焉其  
意蓋謂前此蠻亂中國中國之人因此而肆為攻劫

之寇殺人之賊在內之姦在外之宄故命臯陶作士以治此寇賊姦宄之人而主意初不在蠻夷猾夏林少穎求其說不得乃謂此非境外之蠻夷舜世九州之內蓋有蠻夷與吾民雜居如揚州冀州之島夷青州之萊夷徐州之淮夷梁州之和夷之類則猾夏者蓋此輩此亦章合之說也唐孔氏謂蠻夷猾夏寇賊姦宄唐堯之聖協和萬邦不應末年類至于此蓋少有其事辭頗增甚歸功於人作與奪之勢耳此說有

理士理官也鄭玄謂士察也主察刑獄之事故謂之  
士五刑墨劓剕宮大辟也有服服其罪也呂刑謂上  
刑適輕下服下刑適重上服是也五刑謂五流不忍  
加誅制為五等流法以宥之也有宅者居其所之謂  
也蓋皋陶作士於五刑則原其輕重而服其罪而所  
服則有三就焉于五流則亦原其輕重而宅其地而  
所宅則有三居焉三就者孔氏謂行刑當就三處大  
罪于原野大死于朝士于市此說甚善蓋五刑所服

其罪各有輕重五流所居其流各有遠近其說可以  
該五刑此王氏為長惟明克允者蓋五刑五流其用  
各有輕重遠近惟明足以有察則能原人之情而定  
其罪故或刑之或流之斯能允當也舜命契為司徒  
教以一言曰寬命皋陶作士教以一言曰明所在至  
重而戎飭不過一言此其所以簡而易守歟

帝曰疇若予工兪曰重哉帝曰兪咎重汝共工垂拜稽  
首讓於殳斯暨伯與帝曰兪往哉汝諧

禹既由司空以宅百揆于是又求其可為司空以代禹者也周禮考工記國有六職百工居其一焉鄭氏曰百工司空事官之屬唐虞以上謂之共工此說恐未盡唐虞雖謂之共工然亦謂之司空伯禹作司空是也僉曰垂哉四岳見垂能任百工之事而薦之也垂有創物之巧精于制器所謂垂之竹矢是也汝共工謂使汝居是官猶汝后稷播時百穀意孔氏見無作字遂云共謂共其執事則與堯典所稱者異文無



是理

帝曰疇若予上下草木鳥獸僉曰益哉帝曰俞咨益汝作朕虞益拜稽首讓于朱虎熊羆帝曰俞往哉汝諧按孟子禹平水土之初舜命益掌火益烈山澤而焚之則益掌山澤亦已久矣至此又命之者蓋洪水未平草木暢茂禽獸繁殖禹雖欲施功有不可得故先禹而命益使焚山澤以除草木之障塞禽獸之逼人今洪水既平舜將求人若上下草木鳥獸故朝臣以

其前曾焚山澤能知鳥獸草木之異故共薦于舜使作虞官也若之為言謂順獮祭魚然後漁人入澤梁豺祭獸然後田臘草木零落然後入山林此所謂若上下草木鳥獸其事與烈山澤而焚者不同故知此命與前命實不同不可泥孟子而疑此也唐孔氏謂此官以虞為名言朕虞者猶言作我虞耳朕非官名然則官名為虞者豈非欲其度禽獸草木之宜而若之乎若草木鳥獸而言上下草木鳥獸先儒以上為

山以下為澤猶言若山澤間所生草木鳥獸爾要之  
草木鳥獸或上而生于山或下而生于澤則謂上下  
為山澤亦有理也但益所讓朱虎熊羆孔氏以為二  
人據左傳謂高辛氏有才子伯虎仲熊既為二人則  
朱與羆亦當為二人朱博士云及斯伯與三人也故  
云墮以別之朱虎熊羆四人也故不言墮此言為善  
帝曰咨四岳有能與朕三禮僉曰伯夷帝曰俞咨伯汝  
作秩宗夙夜惟寅直哉惟清伯拜稽首讓于夔龍帝曰

俞往欽哉

禮之品有五吉凶軍賓嘉是也五者具別有三十六  
周官大宗伯備言之是典禮之官於此五者無所不  
掌今舜欲求典禮之官乃使之典三禮孔氏謂三禮  
為天神地祇人鬼之禮則此三禮特五禮所謂吉禮  
而已然巡守尚修五禮不應此獨典三禮林少穎謂  
典禮之職于吉凶軍賓嘉之事雖無所不統然實以  
郊廟祭祀為主故但云典三禮蓋人君盡孝敬以祀

天地祖宗則民歸厚此實禮之本也此說甚善舜既  
咨四岳欲求典禮之官故四岳採衆臣之議同辭以  
伯夷為薦說者謂舜命九官惟宅百揆典三禮言咨  
四岳蓋重其事故必咨于大臣一說又謂禹伯夷而  
咨四岳而得薦之之辭皆言兪曰垂益雖不言咨四  
岳而薦之之辭亦以兪曰為言往往當時亦必詢于  
四岳經不言者蓋史官經緯其語以成文理使上下  
文勢互相發明二說皆近似故特存之四岳既薦伯

夷故舜乃俞而然其所薦且浴伯夷曰汝伯其為我  
作秩宗以典禮典禮之官謂之秩宗者蓋宗如宗主  
之宗故先王之制一族之內以長子主祭祀則謂之  
宗子記曰支子不祭祭必告于宗子則長子之謂宗  
子者以其為祭祀之主故謂之宗子然則典禮之官  
謂之秩宗者豈非以天秩之禮而彼實主之乎故成  
周掌邦禮者謂之宗伯掌都宗之禮者謂之都宗人  
冢宗人亦此意也舜既浴伯夷使作秩宗于是戒之

曰夙夜惟寅直哉惟清蓋寅也直也清也三者皆所以事郊廟交于鬼神之道也寅者敬而不慢直者正而不諂清者潔而不污伯夷誠能夙夜盡此三者則神必感之矣一說謂戒伯夷曰汝典禮之官誠能夙夜惟寅直哉惟清則于事神之道肅清而神無不格此說亦通舜既知伯夷可用而戒飭之言又精切如此伯夷乃因讓于夔龍宜舜所以不許其讓而戒以往欽哉者蓋欲其往敬乃司也

帝曰夔命汝典樂教胄子直而溫寬而栗剛而無虐簡而無傲詩言志歌永言聲依永律和聲八音克諧無相奪倫神人以和夔曰於予擊石拊石百獸率舞

此亦因伯夷之讓前所掌故舜稱而申戒之也說者多謂前稱稷契臯陶皆直言汝作司徒汝作士未嘗言命典樂命汝作納言則夔乃因伯夷之讓而任用之不可謂二臣前已任用至此特申戒之也殊不知新命之臣未嘗不讓若此二臣亦為新命則何獨不



讓況舜一命夔夔即應聲言百獸率舞若二臣果新  
命何為一旦能致如此之功效哉此必不然也胄子  
者胄之為言胤也胤之為言嗣也繼父世者為長子  
胄子即長子也即王制所謂王太子王子羣后之太  
子卿大夫元士之適子者是也周官大司樂掌成均  
之法舜戒夔以教胄子之法皆所以發揚宣尊使因  
其和聲作其和心心則于道必超然獨得故也大  
司樂以樂德教國子中和祗庸孝友以樂語教國子

興道諷誦言語自直而溫至簡而無傲即教以樂德也自詩言志至律和聲即教以樂語也蓋人之氣質直者常勁正而不溫和寬者常緩怠而不莊栗莊栗即恭謹之謂也剛强者常失于苛虐簡易者常失于傲慢皆失之一偏不合于中和之理故教者因其直則教以溫因其寬則教以栗因其剛而教以無虐因其簡而教以無傲皆使之于中和不蹈一偏之失此所謂教以樂德也既教以樂德則氣質全美氣質全

然後可教以樂語而發越其良心自詩言志以下皆是也詩如今三百篇之類古亦有詩謂之詩言志者蓋使之諷誦其詩即詩以稱述其所志也既以詩言其所志則情動于中而言有不足以盡其志者故欲使之即是詩而歌之所以永其所言即所謂言之不足故詠歌之非于詩之外又有所謂歌也既歌以永言則發揚蹈厲已極其所欲言矣故又以其所永之言依之于宮商角徵羽之五聲言與聲既協由是描

之于十二律以和之使前所言所歌常寓于聲律之間一聞聲律則向所言所歌雖愈久而常不越于耳目之近教之至此則邪心蕩盡良心日生教人之道復有妙于此者乎舜既以是戒變然又恐變教之不力故又教之以樂教之能至于此則八音諧和疾徐高下各有倫類無相侵奪幽而神明而人且和矣況曹子哉唐孔氏謂帝言此者命發使勉之此說是也一說又謂直而溫至簡而無傲為教人之道且引孔

子曰吾無隱乎爾是教人者欲其直詩曰貳色貳笑  
是教人者欲其寬記曰師嚴然後道尊是教人者欲  
其剛易曰再三瀆瀆則不告是教人者欲其簡變將  
以樂教胄子必在我者有是德然後可以用樂自詩  
言志以下所謂以樂教人也故有是德然後用樂則  
樂之和且可以感神人況胄子乎儻無德以為之本  
而徒用樂以為之文則所用樂者不過聲音節奏之  
間而已何以教胄子哉是故大司樂之教國子亦必

以德為之本而後以六樂為之文者正此意也此說  
不若前說為長然叅之命伯夷典禮既言洛伯汝作  
秩宗于下即言夙夜惟寅直哉惟清皆言典禮之官  
其德當如此則此言命汝典禮教胄子于下即言直  
而溫至簡而無傲者是亦教人者其德當如此以此  
推之故知後一說于經亦通故併存之舜既命夔典  
樂教胄子夔即對以於予擊石拊石百獸率舞說者  
皆疑之謂舜方命以職不應遽有是效皆指為益稷

脫簡重見于此余謂筆削聖人之經以就已意此學者大患况舜命九官其不讓者考之孟子皆是前此用之已久至此特因其相遜重述其所掌以申警之故自稷契以下皆不讓不讓者既為舊有職任則夔之典樂蓋已久矣舞獸之效正不可疑其非一朝一夕之所能致唐孔氏謂夔言此者以舜戒以神人以和欲使勉力乃答之以百獸率舞言此帝德以及鳥獸此說幾是然唐孔氏以此明夔所以言此之意則

善但所以解擊石拊石百獸率舞之言則未詳惟王氏之徒謂堂上之樂以象宗廟朝廷之治堂下之樂以象鳥獸萬物之治石者堂上之樂也變方擊石拊石以象宗廟朝廷之治鳥獸不待堂下之樂固已率舞以此見舜功化之敏樂之形容有所不逮也堂上之樂非止于石特曰擊石拊石者蓋八音惟石難諧舉石則餘不足道也詩曰鼗鼓淵淵嘒嘒管聲既和且平依我磬聲以此知樂之和由石聲而依之也夫



石一也或言擊或言拊唐孔氏謂擊是大擊拊是小擊言其輕重各有法也於字釋文無音當如字作一句連讀而曾彥和林少穎諸公皆云此當為嘆而自作一句讀為烏字如堯典言僉曰於縣哉之於同此說亦通

帝曰龍朕聖讒說殄行震驚朕師命汝作納言夙夜出納朕命惟允

此亦因伯夷之讓稱其所掌而申戒也聖嫉也史記

言畏忌讒說則聖為嫉可知讒說邪說也殄行孔氏  
謂舜嫉讒說能殄絕君子之行不若陳少南殄絕也  
說異卓絕之行使人不可跂及者是之謂殄行讒說  
殄行是二事皆足以恐動人之耳目使人厭常而好  
怪背正而趨邪有害于治故舜嫉之嫉其能震動驚  
恐我衆民也夫說讒殄行舜既嫉之嫉之而不以嚴  
刑峻法禁約之誅斥之而乃命龍作納言之官使之  
出入上下之言者何哉蓋讒說殄行所以能恐動衆

聽者時上之志意不宣于下則君之向背民不得而知故讒說殄行日以鼓惑其觀聽下之志意不達于上則民之向背君不得而知故讒說殄行而君無自而察惟納言之官受上言而宣于下使民皆知君之所向在此莫不惟君是從受下言而達于上使君皆知民之所向在此又以觀其草與不草如是則上下之情交乎讒說殄行不及而自破又加必驟加以刑哉然既言夙夜出納又言朕命惟允者蓋舜之意謂

讒說殄行惑人之甚雖命龍草其樊又忍龍于出納之際或以邪為正或以偽為真不能自知故又教之朕命惟允欲其出納之際惟取信以君命其合于君命者乃正言正行不合于君命者乃邪說殄行也如是則出納之際知如是而為讒說如是而為殄行有所不草草之無不中其樊矣

帝曰咨汝二十有二人欽哉惟時亮天工三載考績三考黜陟幽明庶績咸熙分北三苗

舜前既詢四岳咨十二牧命九官至此又總而勅之  
故言汝二十二人則所謂二十二人者蓋四岳一人  
加十二牧為十三人又加九官是為二十二人謂四  
岳九官十二牧也孔氏以四岳為四人故謂二十有  
二人乃禹重益伯夷夔龍六人新命有職并四岳十  
二牧凡二十二人其意蓋謂稷契皋陶皆申命故不  
戒飭此說不然矣夫稷契皋陶是申命四岳十二牧  
豈非申命哉四岳十二牧猶申戒之何獨遺于稷契

至林少穎亦以四岳為四人知孔氏說不通又曲說此四岳九官十二牧當有二十五人舜時咨二十二  
人者蓋當時或有兼居岳牧之任或有在州牧之中  
而居九官之列故言二十二人也凡此皆不可用人  
君代天理物故百官之事莫非天工四岳九官十二  
牧實人君使之亮天工也亮有輔相之義如弼亮四  
世之亮謂欲以輔相天工其事甚重非簡忽所可能  
故舜必戒以欽哉惟時亮天工蓋欲其以欽敬為心

惟以是欽敬之心輔相天工也一說又以時如百工  
惟時之時謂百工之事各因時赴功故戒以欽哉惟  
當因時以亮天工此說雖通然史記載此言直云惟  
時是相天事則不若從前說為可據舜既飭之使亮  
天工然又恐其行之或不力故既言吾三載考爾之  
功以觀爾職之稱否繼而至于三考九年則勤者功  
既久而必成怠者時既久亦可以知其無績吾于  
是升陟其明黜退其幽而加誅賞焉如此則庶績無  
庸

不廣汝可不勉哉此正舜欲其各勉乃事故預要其  
効以勸之也唐孔氏疑庶績咸熙非舜語乃謂自三  
載考績以下乃史述舜事實非舜語其說蓋謂舜命  
羣臣之後經三年乃考其功績經三考則黜陟幽明  
羣臣懼黜思升各敬其事故得衆功皆廣殊不知詳  
味此文實舜語豈可謂舜止言欽哉惟時亮天工不  
應于此曰庶績咸熙胡不觀堯典既分命申命羲和  
繼又總而申戒之亦言以閏月定四時成歲允釐百



工庶績咸熙文勢略相似豈可謂彼謂堯語此非舜  
語哉學者詳味之其理自見分北三苗此句不與上  
文相連不可與為之說只是舜既咨二十二人之後  
繼而分北三苗故作史者因而錄之于下爾三苗之  
君前已竄于三危然未滅其國至是猶怙惡不悛舜  
恐其同惡相濟終或召亂故分北如成周之商頑民  
善者則表厥宅里惡者則殊厥井疆此所謂分北也  
唐孔氏云分謂別北謂背此說得之鄭氏謂三苗即

所竄于三苗者既竄而復不從化故分北之誤矣禹  
貢曰三危既宅三苗丕叙則是所竄于三危者當洪  
水既平之時已丕叙矣不應于此復為亂故當從前  
說為

舜生三十徵庸三十在位五十載陟方乃死

舜居側微三十年然後堯徵用之歷試三年然後居  
攝居攝二十八年堯崩終喪三年然後踐天子位則  
舜踐位乃年六十二今此言舜三十徵庸又三十在

位則是在位始年六十不同者何也蓋舜在位實年  
六十二但作文之體上既言三十徵庸下又言五十  
載乃死不應于此言三十二在位故取其句讀而舉  
其全數以三十言之則詩三百十一篇孔子時言詩  
三百不言十一篇者亦以下語之法以便為貴故舉  
其大數便于句讀而已一說謂歷試三年在二十八  
年之中更加居喪三年是舜徵用三十年在位也此  
說亦通舜定帝位三十三年然後薦禹薦禹十七年

然後舜崩是故既踐位後五十載乃死孔氏以陟方  
乃死謂升道南方廵守死于蒼梧之野而葬焉其說  
本於檀弓有舜葬蒼梧之野一句然孟子言舜生諸  
馮卒于鳴條則死于蒼梧其說不可信矣况揆以理  
有大不可者至實為舜升遐而死也故成王升遐書  
亦曰維新陟王但韓退之亦知孔氏升道南方之說  
為不然而以陟方為升遐至乃死則謂作書者以此  
釋陟方義其意以謂上既言升遐不應于此又言乃

死非下語之法殊不知楊子亦言黃帝堯舜殂落而死與此文勢相同安可以語法為疑而曲生意義哉林少穎此說正出于此

帝釐下土方設居方別生分類作汨作九共九篇彙歛此亡書之序也唐孔氏謂安國以書序序所以為作者之意宜相附近故引之各冠其篇首其經亡者則以序附于本篇之末故此序在此林少穎謂其書既逸則其序之義不可得而強通漢孔氏乃謂舜釐治

下土之諸侯各設其官使居其方又為民別其姓族  
之生分其類使相從故作汨作九共九篇彙飫凡十  
一篇汨治也作興也言治民之功興彙勞也飫賜也  
此皆順序文而為之說未必得書之意故唐孔氏亦  
謂凡此三篇之序既不見其經暗射難以考中孔氏  
為傳特順其文而為之爾是非不可得而知也此說  
甚善河南劉敞為九共當作九邱即八索九邱者是  
也古文邱字並與共字相似安國為隸古定不知邱

字誤以為共遂肆意云述職方以除九邱况職方一  
官出于周公孔子未嘗刪述何云述職方以除九邱  
又此序言方設居方別生分類故知九共當作九邱  
篇言一州故云九篇散之說若自有理然書既亡矣  
無從可據姑亦從之未敢信然也



尚書詳解卷二